

TEZĂUR LITURGIC

3 APRILIE

ACATISTUL SF. CUVIOS NECTARIE DE LA BEJEȚK



MOSCOVA, 2000



Акафист преподобному Нектарию Бежецкому

Кондак 1

Избранному на служение Богу в чине
ангельском, добре Господеви послужившему и
преподобне пожившему, ныне же на небесех с
лики ангельскими и всеми святыми
водворяющуюся, тебе, отче наш Нектарие, яко
великому о нас пред Богом ходатаю, смиренныя
сия хваления усердно приносяще, с любовью
зовем: Радуйся, преподобне отче Нектарие,
иноков светлое украшение.

Икос 1

Ангел земный и человек небесный был еси,
богоносне отче Нектарие, егда гласа Евангелия
добре послушав, и взем крест свой во след
Христа усердно потекл еси и в леса Бежецкия
вселився, в них равноангельское житие показал
еси. Тем же подвиги твоя достойно почитающе,
ублажаем тя похвалами сими:
Радуйся, отечества твоего изрядное украшение.
Радуйся, града Бежецка Божественное
просвещение.
Радуйся, богатство земное ничтоже вменивый.

Радуйся, вся имения твоя, от родителей твоих тебе оставшаяся, нищим и немощным деливый.

Радуйся, в раздаянии того небесных блага получивый.

Радуйся, преподобне отче Нектарие, иноков светлое украшение.

Кондак 2

Видев сердцеводец Господь души твоея чистоту и помышлений, подаде тебе крепость и силу противостояти искушениям, от мира, плоти и диавола находящим, да избегнув всех земных попечений, невозбранном помыслом и чистым сердцем Богу Единому поработаеши, поя Ему: Аллилуиа.

Икос 2

Разумев жития сего прелесть временну быти и скоропогибающую, потщался еси единого нетленного и николиже оскудевающего сокровища во Христе взыскати, и яко елень на источники водные, сице устремился еси и другиа удовлети, зовущия тебе таковая:
Радуйся, Божий избранниче, искушеньми мира сего никакоже прельстивыйся.
Радуйся, мудрый странниче, небесного отечества взыскавый.

Радуйся, вольную нищету Христа ради паче богатства возлюбивый.

Радуйся, чистоту души и тела твоего Христу непорочно соблюдый.

Радуйся, сердце твое любовью Того сладце уязвивый.

Радуйся, умом твоим непрестанно Тому предстоявый.

Радуйся, преподобне отче Нектарие, иноков светлое украшение.

Кондак 3

Силою благодати Божия укрепляем, удалился еси бегая мира суетного и водворился еси в лесах Бежецких, в дубенятах [1], чая Бога спасающего Тя от малодушия, и тамо место обрет, келийцу малу создав, поучался еси мысленно на гору добродетелей восхождению, непрестанно поя Богу: Аллилуиа.

Икос 3

Имея едино попечение, како угодити Господеви, добрым подвигом подвизался еси, яко добр воин Иисус Христов, да возможеши козни вражия одолети и победитель тех явиться. Сего ради ублажаем тя:

Радуйся, ради Господа твоего не имевый где главу преклонити, обычного человекам жилища

не стяжавый.

Радуйся, покров — небо, одр же — землю точию имевый.

Радуйся, первому новья благодати Крестителю Иоанну подражавый.

Радуйся, подобно тому дивным бытием земным питавайся.

Радуйся, смирением высокая, нищетою богатая дарования стяжавый.

Радуйся, преподобне отче Нектарие, иноков светлое украшение.

Кондак 4

Бурею неистовых страстей одержими, разбойницы на тя нападоша и келийцу твою разориша. Ты же незлобив сый молился еси Богу не поставити им греха сего, сам же ино место, суровейшее, обреет, на вящия подвиги устремился еси, Богу благодарения возсылая, пел еси: Аллилуиа.

Икос 4

Видя, преподобне, возлюбленнаго ти сродника Луку к тебе грядуща, зело удивился еси, и тек в сретение тому, облобызая его с любовию, Бога же вельми благодарил еси, яко такова юна отрока на безмолвное житие приведе, его же приим, на участие подвигов твоих соделал еси.

Темже слыши сия:

Радуйся, монашескаго жития правило
изряднейшее.

Радуйся, безмолвия образе любезнейший.

Радуйся, лестнице духовнаго восхождения.

Радуйся, трудов постнических прохождение.

Радуйся, праведною жизнью Господу угодивый.

Радуйся, преподобне отче Нектарие, иноков
светлое украшение.

Кондак 5

Боготечная звезда явился еси сроднику твоему,
наставляя его на стезю добродетелей, якоже бо
звезда оная волхвам являвшаяся вертеп
рождшагося на земли Господа показа, тако и ты
Господа, в сердцах ищущих Его почивати
изволящаго, тем показал еси, научая
непрестанно воспевати Ему: Аллилуиа.

Икос 5

Слышав отец отрока, яко сын его купно с тобою
в лесу в благоугождении пребывает, ослеплен
духом злобы, не разуме прославить о сем Бога,
но в ярости исполнился еси досаждения тебе,
преподобне, со словесы укоризненными. Ты же
кроток сый и смирен сердцем, ничтоже противу
вещал еси, в тайне сердца своего о обращении
палимаго молился еси. Сего ради зовем ти:

Радуйся, кротости и незлобия рачителю.
Радуйся, от брата твоего по плоти оскорбления и поругания приемый.
Радуйся, по словеси Евангельскому не противитися злу, ничтоже вопреки отвещавай.
Радуйся, возлюбленного твоего юношу духовно воспитавай.
Радуйся, лишенного того сожителства, зело огорчивыйся.
Радуйся, преподобне отче Нектарие, иноков светлое украшение.

Кондак 6

Проповедует дубовый лес Бежецкий и чудеса твоя, отче преподобне Нектарие, ты бо крест Христов на рамена твоя взял, усердно и неуклонно Тому последовал еси, с Павлом Апостолом дерзновенно глаголай: вся могу о укрепляющем мя Христе; Ему же предстоял еси умом и сердцем, зовый: Аллилуиа.

Икос 6

Возсия свет познания человеколюбного смотра Божия о спасении коегождо человека в сердце брата твоего, преподобне, егда узре он сына своего, нуждею от тебе уведенного, смертоносным змие уязвления мертв лежаща, познав убо грех свой, раскаявся и возвратився к

тебе поведѣ о приключшемся, зело плачѣся
прощения прося. Ты же слышав о смотрении
Божии, дивѣся, повелел еси отрока при пещере
твоей погребсти, да над гробом его молитися
возможешѣ. Приими убо от нас сицевая:
Радуйся, яко твоею молитвою ученику твоему
нуждею в мир влекомому, никакоже тамо
возвратитися попустивый.
Радуйся, яко смерть того не смерть, а паче
преселение в жизнь вечную явился.
Радуйся, яко сею смертию сына, ослеплен сый
духовными очами, просветися.
Радуйся, яко много может молитва твоя, яко
молитва праведника.
Радуйся, незлобием твоим ярость брата на
кротость преложивый.
Радуйся, того к покаянию приведый.
Радуйся, преподобне отче Нектарие, иноков
светлое украшение.

Кондак 7

Хотѣй душу свою спасти, о плоти твоей всяко
небрегл еси, на земли бо лежанием, пощением
же и бдением себе изнурѣя, плоть твою духови
совершенно покорил еси и единого хлеба
животнаго Иисуса сладкаго взыскал еси, Емуже
во всенощных стоянїях, яко ангел безплотен
немолчно пел еси: Аллилуїа.

Икос 7

Дивный воистину образ подвижничества
показал еси, отче, в дупло бо древесное вместо
келии вселился еси, всяку тесноту претерпевая,
по апостольскому словеси: лишен, скорбящ,
озлоблен, аще весь мир не бе достоин еси тебе.
Приими убо, отче, аще и скудное, но с любовью
тебе приносимое хваление сие наше:
Радуйся, терпения столпе неподвижный.
Радуйся, мужества духовнаго адаманте твердый.
Радуйся, в брненном телеси твоём, яко же и в
души твоей Бога прославивый.
Радуйся, еще жив сый Христу сраспныйся и
Тому умерый.
Радуйся, образом подвижничества твоего
Ангелы удививый.
Радуйся, тем полки демонския отгнавый.
Радуйся, преподобне отче Нектарие, иноков
светлое украшение.

Кондак 8

Странно бе пастырем в необитаемой пустыне
узрети человека, в кожану ризу одеяна,
необувенна и без покрова главнаго, под лучами
солнца палящаго на горе стояща. Текше убо в
селение поведаша людям, призывающа их, да
шедше видят сего ангела во плоти и прославят
Дивнаго во святых Своих, поюще Ему: Аллилуиа.

Икос 8

Все жители селения того, слышавше от пастырей о твоём в пределах их пребывании, возрадовася и Бога вельми благодарisha, таковую благодать им тобою даровавшего, к тебе же, отче, приити потшашася, благословения и молитв твоих просяще, и тако возглашаша ти: Радуйся, града нашего светильниче всесветлый. Радуйся, молитвенниче и предстателю о нас пред Богом тёплый. Радуйся, пастырю и отче наш предобрый. Радуйся, недугов наших телесных врачу безмездный. Радуйся, душевных наших язв целителю благодатный. Радуйся, преподобне отче Нектарие, иноков светлое украшение.

Кондак 9

Всякое естество ангельское радуется о едином грешнике покаившемся и на добродетельное житие обращающемся, кольми паче возрадовашася вси Ангели Божии, видяще твоё не точию добродетельное, но и воистину равноангельское житие, емуже ты и приходящия к тебе ученики твоя наставляя еси, и собор иночествующих ко Христу привел еси, вопиющих Ему: Аллилуиа.

Икос 9

Витийства риторские, аще и много глаголют в похваление преподобных пустынножителей, но никакоже возмогут по достоянию воспети я: тии бо яко звезды на тверди церковней десницею Творческою возженные, светло сияющия, мглу страстей земных прогоняют и к небесному отчеству странникам земным путь указуют, в нихже и ты, отче преподобне, сияеши и тако звати тебе научаеши:

Радуйся, звездо светозарная, солнце мысленное, нам путь указующее.

Радуйся, наставниче и учителю наш премудрый.

Радуйся, сосуде земли, гноение душевное отъемлющая.

Радуйся, жертва самосожженная Агнцу Божию, за мир закланному.

Радуйся, Владыце мира служителю благоприятный.

Радуйся, преподобне отче Нектарие, иноков светлое украшение.

Кондак 10

Спасти восхотеша благочестивыя людие собрата своего от мучащаго его диавола, нуждею привлекоша его к тебе, отче Нектарие, ты же милосердствуя о страждущем, молитвою и креста знаменiem духа прогнав, здрава того

сотворил еси. Смирен же быв сердцем, недостойна и немощна себе быти сказуя, Богу Единому благодарение возсылати научал еси и пети Ему: Аллилуиа.

Икос 10

Стене подобную скалу каменную неприступныя высоты обрет, не утратился еси взыти на ню и вселитися, яко бо елень от стрел на горы убегает, тако и ты стрел похвал человеческих и славы суетныя бегая, на неприступную гору возшел еси, идеже подвиги твоя усугубил еси, тем же слышиши сия:

Радуйся, еленю мысленный, на высоту боговедения возшедый.

Радуйся, славы человеческия избегнути тщавыйся, но от прославленного тобою Господа прославленный.

Радуйся, дар чудотворения от Того приемый.

Радуйся, бесы от человек прогоняй.

Радуйся, от коварства и искушений тех соблюдаяй.

Радуйся, на стезю добродетели нас наставляяй.

Радуйся, преподобне отче Нектарие, иноков светлое украшение.

Кондак 11

Пение благодарственное принесе тебе муж оный, тобою от беснования исцеленный, и припад, омываше нозе твои слезами и лобызаше. Такоже и вси людие, чудо сие тобою сотворенное видевше, похвалами тя почтоша, преподобне, Бога же таковую благодать тебе даровавшего, вельми благодарisha, поюще Ему: Аллилуиа.

Икос 11

Светозарное житие твое, яко свеща десницею Вышняго возженная, не возможе утаиться по словеси Евангельскому: никтоже вжег светильник под спудом поставляет его, но на свещнице, да светит всем. Тако услышано бысть повсюду и о твоём равноангельском житии, еже увидев царь болгарский Петр, вождеде видети тя и благословение от тебе прияти. Послав убо к тебе от себе моление, злата довольно в дар принесе. Ты же отвечал еси царю: злата твоего не требую, любовь же твою приемлю, обаче в житии сем временнем не имамы друг друга видети. Печален бысть царь о словеси сем, но исполнь сый любви к тебе, сия приглашаше тебе: Радуйся, над всеми мира сего прелестями преславно воцаривыйся.
Радуйся, злато, яко блато вменивый.
Радуйся, нищету паче богатства возлюбивый.

Радуйся, тою небесное наследие купивый.
Радуйся, Царя царствующих воине
изряднейший.
Радуйся, Господа господствующих служителю
предобрый.
Радуйся, преподобне отче Нектарие, иноков
светлое украшение.

Кондак 12

Благодатию Божией уведев время от жития сего
отшествия, призвал еси ученики твоя, последнее
благословение им подал еси, завеща
пустыннаго жития уставы неуклонно соблюдать,
наипаче же во устах и в сердце имя сладчайшее
Господа Иисуса непрестанно имети, и тако в
руце Господа душу твою предал еси, не
преставая пети Ему: Аллилуиа.

Икос 12

Поюще подвиги и труды твоего
равноангельского жития и множество чудес
твоих, имиже прославя тя Христос, ублажаем тя,
яко таинника Божия благодати, с любовью
зовуще тебе:
Радуйся, благий рабе и верный, вшедый в
радость Господа твоего.
Радуйся, небеснаго Иерусалима гражданине
блаженный.

Радуйся, Царства Божия наследниче.
Радуйся, сеявый слезами, радостью пожинавый.
Радуйся, лицезрением наслаждаясь
сладчайшаго Иисуса, Егоже в сердце твоём
носил еси.
Радуйся, преподобне отче Нектарие, иноков
светлое украшение.

Кондак 13

О, преподобне и богоносне отче Нектарие, тебе
на небесах ныне молящемуся, мы, грешнии, на
земли ныне странствующие и многими
напастями и беды обуреваемии, усердно
молимся: помози нам прочее время жития
нашего безбедно прейти в покаянии и
исправлении зол, содеянных нами, да
помиловани бывше от Праведнаго Судии и
Господа нашего, сподобимся с тобою и всеми
святыми всегда воспевати Ему: Аллилуиа.
[трижды, затем Икос 1 и Кондак 1]

[1] Микрорайон Бежецка, расположенный на месте, где среди
дубравы, по преданию, стояла Введенская обитель преподобного
Нектария, носит до сих пор название «Дубенята».

Выкладываю в «Уставные заметки» акафист преподобному Нектарию,
игумену Введенскому, Бежецкому чудотворцу (†1492, память 3
апреля). Акафист воспроизводится по брошюре «Преподобный
Нектарий Бежецкий», выпущенной в 1994 году (без прочих выходных
данных) в серии «Исконные святые Тверской земли» (текст акафиста
— на стр. 9 – 16) к 500-летию со дня преставления преподобного.